

Máreha bearaš



Máret lea 6-jahkásaš nieiddaš. Sus lea 3-jahkásaš uhca viellja, gean namma lea Ásllat ja 17-jahkásaš stuorra oabbá, gean namma lea Sára. Dasa lassin Máret bearrašii gullet eadni, Injá ja áhčči, Jovvna. Máret eatnis leat guokte oappá, Áile ja Risten. Áile lea Inggá boarrásut oabbá ja son lea Máreha goaski. Risten lea Inggá nuorat oabbá ja son lea Máreha muottá. Inggás, Áilles ja Ristenis lea maiddávi viellja, gean namma lea Issát. Son lea Márehii eanu. Injá, Áile, Risten, Issá leat oappážagat ja sis leat seamma vanhemat. Sin eatni namma lea Luomi ja áhči namma leat Sámmol. Luomi lea Máreha áhkku ja Sámmol lea Máreha áddjá.

Áile-goaski lea náitalan nappo sus lea isit, gean namma lea Vulle. Vulle lea Máreha máhka. Risten-muotásge lea boatnjá. Boatnjá namma lea Heaihka ja son lea maiddávi Máreha máhka. Issát-ednos lea Márjá-nammasaš moarsi, geainna son áigu náitalit. Márjjás šaddá dalle Máreha ipmi.

Áile-goaskkis ja Vulle-mágas eai leat mánát. Risten-muotás ja Heaihka-mágas lea okta nieida, gean namma lea Milja. Son lea Máreha oarpmealli. Issát-ednos ja Márjá-ipmesásas lea Mihkkal-nammasaš bárdni ja son lea Máreha vilbealli.

Máreha áhčis, Jovvna lea oabbá, gean namma lea Rávdná. Rávdná-siessá ii leat náitalan, iige sus leat irgi. Jovvna-áhčis ja Rávdná-siesás lea boarrásut viellja, gean namma lea Irján. Máret gohčoda su eahkin. Jovvna-áhčis, Rávdná-siesás ja Irján-eagis lea dasa lassin maid nuorat viellja ja su namma lea Juhán-Ánde. Son lea fas Máreha čeahci. Irján-eagis ja Juhán-Ánde-čezis lea guktuin Sunná nammasaš eamit. Guktot Sunnát leaba Máreha imit. Sunnát eaba leat fulkkežat, muhto go sudnos leat seamma namma, de soai leaba gáimmežat. Irján-eagis ja Sunná-imis leat guokte nieidda nappo nieidda-guoktá leaba Máreha oarpmealit. Juhán-Ánde čezis ja nuppi Sunná-imis leat guokte bártni, bártni-guoktá leaba Máreha vilbealit. Gándda-guoktá leaba šaddan seamma beaivvi nappo soai leaba jumežat. Jovvna, Rávdná, Irján ja Juhán-Ánde leat oappážagat nappo sis leat seamma vanhemat. Sin eatni namma lea Siggá ja áhči namma lea Gábe. Siggá lea Máreha áhkku ja Gábe lea Máreha áddjá.

Gažaldagat:

Mii lea Máreha oappá namma? Naba vielja namma?

Mii lea Mihkkal Márehii?

Gii lea Máreha oarpmealli?

Leago Irján Jovvna-áhči nuorat vai boarrásut viellja?

Leago Risten Injá-eatni nuorat vai boarrásut oabbá?

Gii lea Máreha eanu?

Gean áhči lea Gábe?

Gean eadni lea Luomi?